

А. Д. ПАПАЗЯН, *Аграрные отношения в Восточной Армении в XVI—XVII вв.*, Ереван, 1972, 302 стр., цена 1 р. 81 к.

Մեր պատմագիտական գրականության մեջ Արևելյան Հայաստանի հողային հարաբերությունների մասին կան մի շարք աշխատություններ: Սակայն ցայսօր լիքի էր ուսումնասիրված այդ հարաբերությունների պատմությունը XVI—XVII դդ.: Այդ բացը լրացրեց պատմական գիտությունների դոկտոր Հ. Դ. Փափազյանը՝ իր «Հողային հարաբերությունները Արևելյան Հայաստանում XVI—XVII դդ.» աշխատությամբ: Տիրապետելով արևելյան ու եվրոպական մի քանի լեզուների և խորապես ուսումնասիրելով թեմայի աղբյուրներն ու գրականությունը, Փափազյանը կարողացել է հաղթահարել իր առջև կանգնած բազմաթիվ դժվարությունները և գիտականորեն շարադրել Արևելյան Հայաստանի նշված ժամանակաշրջանի հողային հարաբերությունների պատմությունը:

Հեղինակը նախապես բնութագրում է իր թեմայի աղբյուրները, տարբերում արժանահավատը անարժանահավատից, առաջնայինը՝ երկրորդականից, ապա անցնում է գրականությանը և, զնահատելով իր նախորդների կատարած աշխատանքը, նշում, որ սովետական հետազոտողների ջանքերով արդեն լուծված են Արևելյան Հայաստանի XVI—XVII դդ. հողային հարաբերությունների բազմաթիվ պրոբլեմներ: Օարունակելով խորացնել այդ պրոբլեմների ուսումնասիրությունը, նա առաջ է քաշում ու լուսաբանում այնպիսի խնդիրներ, որոնք տակավին մնացել էին ստվերում: Հ. Փափազյանը ընթերցողին ներկայացնում է նաև իր թեմայի կապակցությամբ արտասահմանյան պատմագրության զարգացման մակարդակը:

Պատմագիտական ղզալի հետաքրքրություն է ներկայացնում գրախոսվող գրքի այն բաժինը, ուր բնութագրվում է Արևելյան Հայաստանի դրությունը Սեֆյանների տիրապետության ժամանակաշրջանում: Հեղինակը ցույց է տալիս, որ XV—XVI դդ. հայ ֆեոդալական տների մեծ մասը, կորցնելով իր հողային տիրույթները, դուրս մղվեց նաև բաղադրական ասպարեզից: Ոմանք իրենց անձը և ունեցվածքը փրկելու համար մահմեդականություն ընդունեցին, մյուսները սկսեցին զրադվել առևտրով, իսկ երրորդները՝ դիմագրավեցին և ընկան անհավասար մարտերում: Խոշոր հողատիրությունից հայ իրա-

կանության մեջ հարատևեց միայն վանական կալվածատիրությունը: Հեղինակի այս ամփոփումը, հանդիսանալով նախորդ հետազոտողների ընդհանրացումների հաստատումը, կարևոր նշանակություն ունի ոչ միայն արևելյան հողային հարաբերությունների, այլև աղատագրական շարժումների ուսումնասիրման համար:

Հ. Փափազյանը նշում է, որ հայ ֆեոդալներից բռնագրավված հողերը օտար տիրակալների կողմից պետականացվեցին և մտցվեցին «բեյթուլ-մալ» տիրույթների շարքը, այսինքն՝ այնպիսի տիրույթների, որոնց գերագույն սեփականատերը հանդիսանում է պետությունը: Միայն ամիրի կամ շահի թույլտվությամբ դրանք կարող էին օտարվել և անցնել այս ու այն ահմաթի ձեռքը (էջ 78—79): Սակայն, իրավացիորեն եզրակացնում է հեղինակը, դա չի նշանակում, որ Արևելյան Հայաստանում վերացավ մասնավոր ֆեոդալական հողատիրությունը: Ընդհակառակը, XVI—XVII դդ. այն լայն տարածում ընդունեց և դրսևորվեց ամենից առաջ ոչ պայմանական կամ մուլքային հողատիրության ձևով (էջ 82—83): Այդ հողատիրությունը բնութագրվում էր նրանով, որ տերը անկաշկանդ կարող էր ժառանգել, նվիրել կամ վաճառել իր տիրույթը:

Մերժելով Ս. Մարկոսյանի և այլոց այն տեսակետը, թե մուլքագարը կամ մալիքը իրեն սեփականատեր հանդես էր գալիս միայն ունեւտայի նկատմամբ, Հ. Փափազյանը արխիվային բազմաթիվ փաստերով ցույց է տալիս, որ ինչպես իրանի այլ շրջաններում, այնպես էլ Արևելյան Հայաստանում հողի գերագույն սեփականատերը իրավապես թեև պետությունն էր, սակայն փաստորեն հողը գտնվում էր ֆեոդալ-մալիքների ձեռքում, որոնք իրացնում էին սեփականատիրոջ բոլոր իրավունքները: Բանն այնտեղ էր հասնում, որ մալիքները հաճախ ձգտում էին օրենսդրությամբ ձևակերպել իրենց սեփականատիրական արտոնությունները (էջ 85): Հեղինակի այս հետևությունը համոզիչ է և հնարավորություն է տալիս հասկանալու նաև ոհնւտայի հարցերը: Արդարև, ինչպես կարող է մալիքը կամ մուլքագարը, չլինելով հողի ֆեոդալական սեփականատեր, ստանալ ֆեոդալական ռենտա կամ հարկ-ռենտա: Զե որ ռենտան ոչ

այլ ինչ է, բայց եթե ֆեոդալական հողային սեփականության տնտեսական իրացումը: Խորանալով իր պրպտումների մեջ, հեղինակը դալիս է այն հետևություն, որ մուլքային հողատնտեսական իրացումը ամենակալուն սեփականություն էին հանդիսանում հատկապես այն հանդակները, որոնք ձևոր էին բերված ժառանգման ու դնման ճանապարհներով (էջ 91):

Մուլքային հողատիրության բնութագրումից հետո Հ. Փափազյանն անցնում է պետական հողատիրությանը և ցույց է տալիս, որ վերջինս XVI դ. կազմում էր Արևելյան Հայաստանի մշակելի հողատարածության 50 տոկոսը: Հողատիրության այդ տեսակը, որ կոչվում էր դիվանի, ընդարձակվեց հատկապես հայ բնակչության հողերի և մուլքային որոշ տիրույթների հափշտակման հաշվին: Փաստական հարուստ նյութերով հեղինակը ապացուցում է, որ իրանական պետությունը այդ հողերը տալիս էր իր ռազմական ավագանուն և պաշտոնյաներին՝ իրրե վարձատրություն նրանց ծառայության դիմաց: Դրա հետևանքով Արևելյան Հայաստանում առաջանում է ֆեոդալական հողատիրության նաև մի այլ ձև, որը կոչվում էր թիուլային հողատիրություն: Ը տարբերություն մուլքի, որը ոչ պայմանական, ժառանգական էր, թիուլը պայմանական, ցմահ հողատիրություն էր. թիուլային տիրույթները պետք է պատկանեին պետական ու զինվորական անձանց այնքան ժամանակ, քանի դեռ նրանք գտնվում էին ծառայության մեջ, որից հետո կարող էին տրվել ուրիշներին:

Սկզբնական շրջանում թիուլգարը բավարարվում էր իր իրավասության տակ գտնվող բնակչությունից հավաքած հարկ-ոկնտայի՝ պետության կողմից որոշված բաժնի ստացումով միայն: Բայց հետագայում նա ձգտում էր սեփականացնել իր կառավարմանը հանձնված տարածությունը և մի շարք դեպքերում հասնում էր դրան: Օգտվելով պետության թուլությունից, թիուլդարներն ավելի շեշտված էին իրացնում իրենց վարչական ու դատական ֆունկցիաները և տիրույթները դարձնում էին ժառանգական (էջ 101): Ուշագրավ են հեղինակի այն դիտումները, որ թիուլային տիրույթներում գյուղացիների վիճակը ավելի ծանր էր, քան մուլքային, քանի որ թիուլգարը իրագործում էր նաև վարչական իրավունքը: Նա ցույց է տալիս, որ պետության անունով հավաքված հարկ-ոկնտայի մեծ մասը լուրացվում էր թիուլդարների և այլ ծառայողների կողմից, սակայն կային և այնպիսի տարածություններ, որոնցից ստացված հարկերն ու եկամուտները գնում էին միայն տեղական իշխանությունների օգտին: Այդ տարածությունները կոչվում էին խալիսե, որ բառացի նշանակում է մարուր, ամբողջ, չխառնված (էջ 106): Նման տարածությունները

Արևելյան Հայաստանում ընդգրկում էին ամենաբարերեր շրջանները և քիչ էին, քանի որ սահմանային երկիր լինելով Արևելյան Հայաստանը կարող էր հաճախակի ենթարկվել արտաքին հարձակումների:

Հ. Փափազյանը վերլուծում է ֆեոդալական հողատիրության նաև մի այլ ձևը՝ վանական-եկեղեցական կամ վակֆային հողատիրությունը: Նա ցույց է տալիս, որ IV դ. սկսած հայկական եկեղեցին ձևոր էր բերել հողային ընդարձակ տարածություններ: Սակայն XIV—XV դդ., երբ կործանվեցին հայկական իշխանությունները, հայ եկեղեցական հողատիրությունը ճնշման է ենթարկվում օտարերկրյա նվաճողների կողմից: Այնուամենայնիվ XVI—XVII դդ. եկեղեցին Արևելյան Հայաստանում դեռ շարունակում էր տիրել ընդարձակ հողերի ու տասնյակ գյուղերի: Ե դրանց մի մասին տիրում էր մուլքի սկզբունքներով, պետությանը հարկ վճարելով: Սակայն իր գյուղերի մյուս մասին եկեղեցին տիրում էր վակֆի սկզբունքով. այդ գյուղերը ազատ էին պետական հարկերից, դրանցից ստացված եկամուտները պետք է ծառայեին սոսկ այն նպատակներին, ինչ նպատակներով այդ գյուղերն ու հողերը նվիրվել էին վանքին: Հեղինակը անդրադառնում է վանքապատկան հողերի վաճառքին կամ գրավին և ապացուցում, որ իրրե կանոն մուլքային տարածությունները՝ կարող էին, իսկ վակֆայինները՝ չէին կարող ներքաշվել նման գործարքների մեջ: Սակայն բացառիկ դեպքերում վակֆային հողերը նույնպես կարող էին վաճառվել կամ գրավ գրվել:

Հ. Փափազյանը լուսարանում է նաև մեր պատմագիտության մեջ քիչ ուսումնասիրված մի այլ հարց, այն է՝ արդյոք էջմիածինը պետությանը հարկեր վճարո՞ւմ էր: Պատմական կոնկրետ փաստերով նա ապացուցում է, որ XV—XVI դդ. այն ազատ էր պետական հարկերից, սակայն XVII դ. արդեն ծանրաբեռնվում է դրանցով (էջ 141—142): Նման կացություն է ապրում նաև հայ հողեկորականությունը:

Վերլուծելով հողատիրության ձևերը, հեղինակը ի հայտ է բերում նաև «հայրենիքը», որը ձևավորվելով դեռ վաղ անցյալում (հավանական է VII—VIII դդ.), շարունակում է գոյատևել նաև XVI—XVII դդ., սակայն արդեն իրրե մուլքային հողերի տարատեսակներից մեկը (էջ 152—155): Ասկա նա նկատում է, որ չնայած նվաճողների գործադրած բռնություններին, Արևելյան Հայաստանում այնուամենայնիվ գտնվեցին առանձին գյուղական համայնքներ, որոնք իրենց համառ դիմադրության շնորհիվ պահպանեցին ինքնուրույնությունը՝ ընդհուպ մինչև XVIII դ. (էջ 194):

Գրախոսվող աշխատության մեջ մեծ տեղ է հատկացվում Արևելյան Հայաստանի գյուղա-

դիտության դրության հարցերին: Հեղինակը ամենից առաջ անդրադառնում է գյուղացիների հողին ամրակցման պրոբլեմին և նշում, որ մինչ-հեղափոխական կուլկասագետների մեծ մասը, նկատի ունենալով շարիաթի դոգմաները, գտնում է, որ Իրանում (այդ թվում նաև Արևելյան Հաստատանում) գոյություն չի ունեցել գյուղացիների ամրակցում հողին, որ նրանք անկաշկանդ տեղաշարժվել են: Զրաժանելով այդ տեսակետը, հեղինակը նորահայտ փաստերով ամրապնդում է պրոֆ. Ի. Պ. Պետրուշևսկու այն եզրակացությունը, որ Սեֆյանների տիրապետության ժամանակ գյուղացիները չէին կարող ազատ կերպով փոխել իրենց բնակության վայրերը (էջ 209):

Փափազյանը նշում է, որ իլխանական շրջանում, այսինքն՝ XIII—XIV դդ., գյուղացիները ամրակցված էին հողին և զրկված տեղաշարժերի իրավունքից: Նա, անշուշտ, նկատի ունի հազան խանի այն հանրահայտ հրովարտակները, որոնք հայտարարում էին, որ եթե ռայաթները հեռանան իրենց բնակած վայրերից, ապա 30 տարվա ընթացքում նրանց կարելի է ետ բերել: Այդ պրակտիկան թեպետև պաշտոնապես վերացել էր, սակայն իրականում շարունակում էր գործել նաև հետագա՝ XV—XVIII դդ. (էջ 210): Հավանաբար այդ իրական փաստի հիման վրա էր, որ Սուլթան-Հյուսեին շահը 1710 թ. հրահանգ արձակեց, որի համաձայն 12 տարվա ընթացքում կարելի էր ետ վերադարձնել իրենց հին բնակավայրերից փախած ռայաթներին: Այդպիսով, եղրափակում է հեղինակը, եթե իլխանական շրջանում փախած գյուղացիներին վերադարձնելու իրավունքը ուժի մեջ էր 30 տարի, ապա Սեֆյանների շրջանում՝ 12 տարի (էջ 212), և հողատերերը, հատկապես թիուղարները, հաջողությամբ օգտվում էին այդ օրենքից:

Հ. Փափազյանը այնուհետև ցույց է տալիս արևելահայ գյուղացիության հարստահարումը իրանական պետության, կալվածատերերի և տեղական հոգևորականության կողմից: Նա մանրամասն թվարկում և բնութագրում է այն հարկերն ու պարտականքները, ֆեոդալական ռենտայի տեսակները, որոնք բնակչությունից դանձվում էին իշխող խավերի կողմից: Ապա իրավացիորեն նշում է, որ գյուղացիության համար որքան ծանր էին հարկային հարստահարումները, այնքան էլ անտանելի էին այդ հարկատաճարումների ժամանակ գործադրած բռնություններն ու շարաշահումները: Նման պայմաններում տեղի էր ունենում բնակչության մասսայական աղքատացում, որը իր բացասական ազդեցությունն էր թողնում արտադրողական ու-

ժերի զարգացման վրա: Աշխատության այս բաժինը արժեքավոր է ոչ միայն նրանով, որ հեղինակը հիշատակում է հարկատեսակներն ու նրանց չափերը ու երևան է բերում հարկային այնպիսի տերմիններ, որոնք մինչև այժմ անհայտ էին, այլև նրանով, որ տալիս է դրանց լեզվաբանական մեկնաբանություններ:

Հ. Փափազյանի աշխատությունը, անշուշտ, արժեքավոր ուսումնասիրություն է: Այն գրված է բազմաթիվ աղբյուրների ու նորահայտ նյութերի հիման վրա՝ դիտական բարձր մակարդակով: Տասնամյակներ շարունակ դեպքվելով մայրենի և այլալեզու (գերազանցապես պարսկական) տեքստերի ուսումնասիրությամբ և հրատարակելով պատմական գիտության համար լուրջ արժեք ներկայացնող նյութերի ու փաստաթղթերի ժողովածուներ, նա հմտորեն օգտագործել է դրանք և ստեղծել մի գիրք, որը բավարար պատկերացում է տալիս Արևելյան Հաստատանի XVI—XVII դդ. հողային հարաբերությունների մասին: Պիտի ցանկանալ, որ հեղինակը նույն ջանասիրությամբ շարունակի իր պրպտումները և փորձի լուսաբանել նաև Արևելյան Հայաստանի XVIII դարի և XIX դ. առաջին քառորդի հողային հարաբերությունների պատմությունը:

Հ. Փափազյանի աշխատությունն ունի մասնակի թերություններ: Այսպես, նա քիչ է խոսում գյուղացիական շարժումների մասին, շոշափում է դրանք դրքի տարրեր բաժիններում: Մինչդեռ այդ շարժումները պետք է լուսաբանվեն հատուկ գլխում: Հեղինակը հակասության մեջ է ճորտատիրության հարցում. մի կողմից նա փաստերով ցույց է տալիս ճորտատիրության հիմնական հատկանիշների առկայությունը Արևելյան Հայաստանում, այն է՝ գյուղացիների հողին ամրակցումը, տեղաշարժերի արգելակումը, կալվածատերերի վարչա-դատական իրավունքները նրանց նկատմամբ և այլն, իսկ մյուս կողմից հայտարարում է, որ XVII դ. Արևելյան Հայաստանի ռայաթները իրենց կալվածատերերի ճորտերը չէին (էջ 209): Փափազյանի դրքում հիշատակվում են բազմաթիվ սոցիալական տերմիններ, որոնք մեկնաբանվում են համապատասխան տեղում, սակայն ավելի լավ կլիներ, եթե աշխատության վերջում բերվէր այդ տերմինների հատուկ բացատրանք: Դա զգալի բացփով կհեշտացներ ընթերցողի գործը:

Այս մասնակի թերությունները չեն նսեմացնում դրախոսվող սոցիալատության արժեքը: Ցանկալի է, որ գիրքը թարգմանվի հայերեն:

Պատմ. գիտ. դոկտոր Ա. ՀԱՄԲԱՐՅԱՆ